

同學仔你哋好！係咪已經急不及待要動手畫海報呢？老師會喺呢堂簡單介紹一下點樣用

PowerPoint 嚟創作靚靚嘅海報，等你哋可以盡情發揮創意小宇宙！

唔知有冇同學試過用 PowerPoint 嚟匯報你嘅專題研習呢？你哋可能好熟悉 PowerPoint 都

未定！咁你哋又知唔知道，其實 PowerPoint 仲可以用嚟設計海報㗎呢？事不宜遲，我哋嚟

開始整海報啦，同學仔係咪已經開咗 PowerPoint 出嚟，ready 好晒啦？

「正確格式有辦法」

平時用 PowerPoint 嘅時候，張紙通常都係打橫嘅。如果想將佢設定成比賽規定嘅 A3 紙格

式，我哋就要去「工具列功能區」揸「設計」→「投影片大小」→「自訂投影片大小...」，寬度填

「3605 px」，高度填「4961 px」。登登！咁張紙就會變成一張 A3 紙咁大。

除咗開一張正確格式嘅畫紙，輸出一個格式正確嘅檔案都係好重要㗎！所以我哋跳一跳步，

假設我已經完成創作呢張海報，可以輸出然後提交畀大會喇。去左上角揸開「檔案」功能表→

「另存新檔」，然後就會見到一個視窗等你可以幫個海報改名，同埋揀一個合適嘅儲存位置。

喺格式呢行，揀「JPEG」或者「PNG」。揸「儲存」→「只存取此張投影片」，搞掂！

既然清楚晒大會嘅格式要求，咁我哋就立即去下一個環節——「形狀、圖片、文字三劍俠」。

就喺呢度會見到好多唔同嘅形狀畀你揀，例如係長方形、圓形、星形，甚至係角色嘅對白框框都有㗎！等我依家畫一個長方形先，再畫一個星形，然後畫一個對白框框。

點選其中一個畫好嘅形狀，會見到六粒小方點，揸住佢哋就可以隨意放大縮細、拉長揸扁。而呢個曲箭嘴，係用嚟旋轉個形狀嘅。有啲特別嘅形狀，可以畀你控制一啲特別嘅特徵。例如係對白框框就可以畀你決定指向邊度。

如果想改變形狀嘅顏色，可以喺呢度「圖案填滿」教佢嘅顏色，同呢度「圖案外框」教佢嘅邊框顏色。望落少少，喺呢度可以設定埋條邊嘅粗度添！

喺大會嘅官方網站上面，可以下載到一系列嘅「健康雙俠」卡通角色。只要喺最上方揸「插入」→「圖片」，然後搵返小健小康佢地一眾角色嘅圖像檔，載入到畫紙上就可以將佢哋融入你嘅海報設計入面啦！

海報點可以冇文字㗎呢？喺最上方揸「插入文字」，然後就可以喺畫面任何地方打字。喺呢度仲可以調教文字嘅大細、顏色。登登！

有咗形狀、圖片、文字三個最重要嘅元素，就可創作出豐富又美麗嘅海報。今日就教住咁多先  
啦，同學仔係咪已經蠢蠢欲動想快啲一試身手呢？記得海報設計大賽嘅截止日期係 2021 年  
嘅 6 月 30 日呀！